

11. februar 2019

Inatsisartut Sulieriaasianni § 33 naapertorlugu, matumuuna aalajangiiffigisassatut siunnersuut saqqummiuppara:

**Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UPA2020-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Henrik Fleischer, Siumut)

**Tungavilersuut:**

Kalaallit nunatta imartai tassaapput inunnik usinillu assartuiffiusut, imarpillu ikaarlugu nunarput nioqqutissanik pilersorneqarluni. Taamaattorli aamma taanngitsoorsinnaanngilara imartavut tassaammata annertuumik aalisartoqarfiusut.

Ilanngullugu maluginiagassaavoq naalagaaffik nunatsinni inissisimasumik imaatigut angallannermut, aalisariuteqarnermut isumannaallisaanermullu ingerlatsisumik immikkoortortaqqarferqarnera.

Oqartussaaffiit namminersorneq pillugu isumalioqatigiissitap isumaliutissiissutaani sukumiinerusumik naalagaaffimmut isumaqatiginninniareernikkut tiguneqarsinnaasutut suliassaqqarfittut II-tut allattorsimapput.

Tamanna namminersorneq pillugu inatsisip nassuiaatitaani Imaani isumanaallisaaneq-mik qulequtaqartumi (allattugaq II, nr. 20), tassani imaani isumannaallisaanermi inatsimmi umiarsuit assigiinngitsut sannaat, atortui ingerlanneqarnerilu pillugit maleruagassat aalajangersarneqarput; taamattaarlu umiarsuarni sulinermi atugassarititaasut, umiarsuaatileqatigiit umiarsuillu naalagaasa akisussaaffii, umiarsuit aallaqqusaajunnaartarneri, suliffeqarfiit umiarsuarnik aalajangersaasartut, umiarsuit uuttortarneqartarnerat, allagartalerneqartarnerat kiisalu nakkutilliinerit aqutsinerillu. Taamattaarlu oqartussaasoqarfiit ajutoortoqartillugu misissuisartut, imaani angallannermi malitta-risassat il.il. kiisalu inuttaqarnermut piginnaasanik piumasaaqatit il.il. umiarsuarnut, inuttanut il.il..

Immikkoortup taassuma nunarsuarmioqatigiinnut atuuttunut annertuumik malittarisassaqqartinneqarnera naliginnaasuvoq, taakkulu atuutsinneqarnerat nunami malittarisassiornikkut isumagineqartarpoq.

Ilanngullugulu namminersorneq pillugu inatsisip nassuiaatitaani umiarsuit nalunaarsorneqartarnerat imaanilu inatsisinut il.il. tungasunut allassimavoq, oqartussaaffiit umiarsuarnut umiarsuaatileqatigiiffinnut il.il. tungasut oqartussaaffeqqarfimmi aamma pineqartut (allattorsimaffik II, nr.

21), tassungalu ilanngullugit qularnaveeqqusiissutinut uppersaatiit, akisussaaffiit, umiarsuarnik sillimmasiinerit kiisalu assartuussinernut isumaqatigiissutit. Taamattaarlu oqartussaaffeqarfimmi aamma pisortanut kiisalu sulianik ingerlatsinerni apeqqutit ilaapput, tassunga ilanngullugit umiarsuit sorliit danskit erfalasuannik erfalasoqarsinnaaneri, eqqartuussivikkoortumik nassuiaateqarneq il.il. kiisalu umiarsuaatileqatigiit nunani allani oqartussaasunut attaveqarnerat il.il.

Isumaqarpunga sulissutigilertariaqaripput tamakkiisumik tamakkununga aqutsiveqalernissarput. Inuiaqatigiuvugummi imartatsinnik misilittagaqarluartut atuilluartullu. Tassami qangarsuaaniilli qajaannarnik umiaannarnillu siulitta nunarput siammarmfigisimavaat, allaammi ullumikkut Kalaallit Nunaata kitaata annersaa inoqarfeqalersimalluni.

Nunatsinni imartatsinnut aqutsiveqalernitsigut nunatta inuisa ilisimasaat atorluaneqarsinnaalissavagut, imaanimi angallannermi maleruagassat eqqarsaatigalugit tamakkua ilisimasat pitsanngorsaannermut atorluaneqarsinnaagamik.

Ilisimavara imartamik atuinermut nunarsuarmioqatigiit malittarisassaqarnerat. Aqutsiveqarfeqalerutta nunarput nammineerluni toqqaannartumik nunarsuarmi isumaqatigiissusiortarnernut akuusinnaalissaaq, taamaalillutalu ilisimasavut aamma iluaqutigisinnaassallutigit. Imartamut aqutsiveqarfik tassaavoq imartani imarsiortunullu tunngaviusumik isumannaatsumik angalanissamut suliaqartartoq. Uagut kalaallit tassaavugut inuiaqatigiit imartatta iluliaqartarnera sersersuarmiillu uukkaasartoqarfeqarnera, minnerunngitsumillu aamma nunatta kangiata imartaaniit sikorsuit kitaanut uiartarneri eqqarsaatigalugit ingerlatsilernissamut ilisimasaniillu avitseqateqarnissamut ajukkunnaateqanngitsut.

Siunnersuutip nunatsinni imarsiorterup inuiaqatigiinnut iluaqutinngortinnissaa siunertarimmagu oqallilluarnissarput neriutigaara.

**Siunnersuutip aningaasatigut allaffissornikkullu pisortanut kinguneqaatissai:**

Nassuiaammik saqqummiussassamik suliaqarneq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulineramik naleqassaaq (250.000 kr. missaani).

Suliassaqarfillu tamarmi tiguneqaruni 25,4 mill. Kr. –inik ukiumut aningaasarstuutigineqarfiussasooq naatsorsuutigineqarpoq. Takuuk suliassaqarfiit angerlaannissaat pillugu nassuiaat oktober 2018-imi inatsisartunut agguanneqartoq.

**Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai:** Soqanngilaq.

**Siunnersuutip innuttaasunut allaffissornikkut aningaasatigullu kinguneqaatissai:** Soqanngilaq.